

翁同龢
日記

翁万戈 编
翁以钧 校订

第六卷

中西書局

翁同龢日記



第六卷

翁萬戈 編
翁以鈞 校訂

目 录

光绪十七年辛卯(1891 年)	2465
光绪十八年壬辰(1892 年)	2541
光绪十九年癸巳(1893 年)	2625
光绪二十年甲午(1894 年)	2707
光绪二十一年乙未(1895 年)	2817
光绪二十二年丙申(1896 年)	2921

光緒

十七年 (1891)

光緒十七年

辛卯正月初晨晴微風午後陰夜晴稍寒寅正起告

天謁

真容即正登車詣隆宗門外敬跪辰初二刻

皇太后自西苑還宮三刻

御心甯宮

上率羣臣行禮畢退至前朝敬跪辰正三刻

上御太和殿羣臣行禮不作樂不宣表是日傳宗親宴

上詣瀛臺晚始還宮退朝敬詣

賢良祠拜西北城宮中城祝壽至葉茂如處喫年糕見也

孫女仍打宮未正至家看復聖廟集

光绪十七年辛卯(1891年)

辛卯正月朔(2月9日) 晨晴,微风,午后阴,夜晴稍寒。寅正起,告天,谒真容。卯正登车,诣隆宗门外敬俟,辰初二刻皇太后自西苑还宫,三刻御慈宁宫,上率群臣行礼,毕,退至前朝敬俟。辰正三刻上御太和殿,群臣行礼,不作乐,不宣表。是日停宗亲宴。上诣瀛台,晚始还宫。退朝敬诣贤良祠。拜西北城客,出城祝兰孙寿。至叶茂如处吃年糕,见侄孙女。仍拜客,未正至家。看《复初斋集》。

初二日(2月10日) 晴,早寒午暖,晚更融融。巳正二刻到成均署,诸公已集,少顷多节之来,同谒大成殿下,余升堂行释奠礼毕,复谒启圣祠,复谒韩文公祠毕,坐敬思堂,复诣彝伦堂团拜,讫,饭,与南学诸生谈。归拜客,未正到家。是日起跪廿二,凡五十四叩头。

初三日(2月11日) 晴,稍寒,午仍暖。晏起,看《复初集》,甚无谓。访颂阁,在彼饭。晚祀神,未见客。是日斋戒期内常服挂珠,向例谒陵必于此日降旨,今日无谕,则已停止矣。圣意轸念畿民,不胜钦感。

初四日(2月12日) 晴。黎明起,影堂叩头后即登车,拜东北城客,转而西,极北而南。出城至松筠庵小坐,食一不托后拜数客,

归日晡矣，腰脚不支。夜邀孙、徐两兄饭，费杞怀同坐。杞怀携烟客画幅九页、《颖井黄庭》、《兰亭》，顾侠君物。皆精绝，又杨子鹤画册，则新得者也。

初五日（2月13日） 晴，有风。天明起，辰初登车，辰正抵坛内帐房。是日上诣南郊斋宫，已初启銮，已正三刻入斋宫。余等站班讫即赴观里药铺，约孙兄及南斋诸公饭，余作东，若农办，未初二散。到厂肆，携石谷画归。今日户部第一日，各堂到署，期以午刻，余先告署友不能到。归后无客来。

李宅厨十二两，房租四两，零钱予庙内香火廿四吊。傢伙在内。

初六日（2月14日） 晴。寅正起，时正享祈行礼之际，和气冲融，意丰年之兆乎。户部奏换左右翼监督。入至朝房，辰初上还宫。奏事者不站班。拜数客归。是日邀两师及同邑诸子饮，两桌，午集申正散。

许师鹤巢、叶师菊裳、殷厚培、季士周、庞纲堂、劬庵、杨莘伯、俞右澜、李君纯、卢经伯、邹介修、沈颂棠、季子固、子陶、叶茂如。

未到：郑季三、放赈。李玉舟、女出痘。邵伯英、母病。季英。

初七日（2月15日） 晴，午前风起，不如昨日之晴朗矣。早间出城拜客，因过厂肆，无所得，食于市楼，义胜居。又拜客，申刻归。两日极暖，开冻矣。

宋拓《十七帖》、德宝。董画册、梦楼题。王烟客轴、皆茹古。耕烟《临安山色卷》。论古。

初八日（2月16日） 晴，午前风又起，今日谷日，不知占者如何。晨再看《十七帖》，得覃溪翁寿字，见王渔洋屏幅。归饭，入署，为今年第一日，各司公服上堂揖，回事甚烦，立谈至六刻，倦甚矣，改铎洛崙捐折。归写素册一本。写发家信。是日两胡师开馆。上于太庙行礼毕回西苑。未传迎驾，亦未作乐。

初九日(2月17日) 晴,无风,午甚暖,早晚馀寒。题一诗于两峰画卷。福相来长谈。晚诣芝庵,遇福相于座。斌得衡山细字册,八十四岁作,牛毛蚊脚,真至宝也。

初十日(2月18日) 晴,无风,暖。皇后千秋,诸臣蟒袍补褂一日。晨诣景师母致赆,十二两、幛一。李兰孙题主,余与麟芝庵襄事,志伯愚、杨莘伯前引。午初二刻毕,即驰归陪客,客皆广东人也:李山农宗岱、许筠庵应璩、李若农文田、张樵野荫桓、刘静皆世安、翁蓼洲为龙。

是日庄顺皇贵妃奉移田村,不知钦天监何以择此日也。上于紫光阁筵宴蒙古王公。

十一日(2月19日) 晴和,无风。户部奏事,五更诣苑门朝房,上还宫行礼,不站班。归偃卧。出城过厂,午后入署。传十七日有书房。

十二日(2月20日) 晴,极暖,午后阴。已初赴总署,各国公使来贺年,凡十国,有廿九人,向来余等皆翻著皮褂,今年始服貂裘,挂朝珠。去岁至各馆亦如此。公使衣冠各各不同,有金边压衣缘者,有帽缀鸡毛者,有挂刀者,惟德国巴兰德仍黑衣,美国使亦常服,午正陆续来,未初散。尚有三起。是日邀数客,申初坐待福相至,酉正毕,谈至戌正罢,肴尚佳。

李中堂兰孙、福中堂箴亨、麟冢宰芝庵、豫大臣锡之、孙总宪燮臣、徐侍郎颂阁。

十三日(2月21日) 晴,尤暖。晨起无事,午刻邀客饮,皆外官也。客退临帖,知腕力之弱。福建查办事件结案。内刘祺祥交部议,劾刚之戚也,曾氏之孤将何赖耶!

曾怀清、觐,前陕臬。清辑廷、瑞,高廉道。吉云帆、顺,口北道。胡鼎臣、廷幹,福建遗缺府。顾辑廷、肇熙,前陕粮道。文仲云。焕,中允,庚辰门人。

十四日(2月22日) 阴,地润,疑将雨,晚乃晴,夜雾。宣庙忌辰。晨到厂肆,挈之善往,买一茶壶而归。午后入署,访颂阁,与燮臣同吃薄饼,晚归。夜卧被厚,喉疼甚。

十五日(2月23日) 晨晴晚阴。是日上御保和殿筵宴蒙古王公,文职一品亦应入座,传辰正二刻,余以卯正二刻至殿门,则已闻钟鼓矣,遂不入,盖未到者多矣。出遇孙兄。午孙兄、颂兄来饭,偕至市肆,抵暮归,腰脚不支,始悟精力之衰矣。夜真容前上供,火锅撤后供元宵。彻夜呻吟。是日暖极,九衢泥淖。

十六日(2月24日) 浓阴。敬收真容。乏甚,未出门,作画。晚赴燮臣招,锡之、芝庵、颂阁同席,暮散。微月。

山东按察使放松林(曹秉哲故),山东盐运使放王作孚(丰绅泰丁)。

十七日(2月25日) 自昨夜丑正起至午正雪始止,约入地三寸许,无风,真快雪也,晚仍微飘,阴未散。是日今年第一日书房,余等先访戈什爱班,入时于外间跪圣安,首陈圣德宜以敬畏为务,其他语尚多,已初退饭。踏雪凌兢,深恐倾跌。归弄笔墨。蔡松甫学博来,右年。伊选四川城口州判,不愿留京矣。太监刘姓发遣,以王姓充带班。

十八日(2月26日) 晴,五更大雾,咫尺不辨,直至巳午,日光如白丸也,午后晴,融融春矣。入时辰初二刻,退时未及巳初,饭罢出。归寓,入署。门人张蔚森士彬来。

十九日(2月27日) 晨五更晴,天明后阴,午又晴,无风,不寒。顺天府报雪三寸馀。上御紫光阁宴朝正外藩,无书房。户部奏事,至公所坐,天明归。已正赴广东三友招,许筠庵、李若农、张樵野。在樵野寓,客则南皮、高阳两相国,颂阁及余也。散后偕颂阁访晤续燕甫,又访王莲生,遇端午桥于坐,谈碑读画,抵暮方行。颂阁来长谈。李元买一七星研,铭乃许文穆公物也,狂喜。闻南书房太监路吉祥、走库李

姓皆交慎刑司。户部奏已革铎洛崙捐賑一万，奉旨销去永不叙用革职处分。

莲生所藏无一不精，略记数件：

唐人写《转轮经》卷，宋元人题。又残字两段，刘文清跋，最秘惜不示人者。又残字一页，大约亦琴泉寺物，而飞动不似吾所得者。又一卷，五代写经六册，彰义节度使布施，金字。沈石田《□庵图》，一时名流题。吴仲圭《草亭诗意图》，吴仲圭《松横秋日》，乃北海物。黄鹤山人画卷，元人陈□□山水卷。仿北苑。

二十日(2月28日) 晴。夜寐不安，遂未入。午邀诸友饮，晚散。微感冒，背冷。吃梨、萝葡汁。

盛伯羲、蔡松甫、王莲生、郑东甫、黄仲弢、费妃怀、王绂卿。

廿一日(3月1日) 晴。是日上诣醇贤亲王园寓行礼，无书房。晏起看书，终日无客来。徐颂阁宅家人王姓回南，将至常熟，因令携奶饼二匣、一信去。背冷愈，头未清。得祥侄腊月廿五函，皆好。

廿二日(3月2日) 晴，早寒。有引见，书房照常，卯正三刻入，整工，已初二刻退。是日皇太后诣醇贤亲王园寝，于圆明园之双鹤斋用膳，诣颐和园，即日还西苑。归后入署，晚邀夔臣、颂阁看研，遂留饭，自申正抵亥初始罢。得荣侄腊月廿五函，平安。浙江藩司许应镠另简。

廿三日(3月3日) 晴。户部值日，早到朝房，无事，遂入。来时已晚，退不加晚也。见各国国书及答语。归后看《会典绘图条例》，有新式炮台船械各图一条拟删去。携集古画册归，尚可看。天津刘二送黄花鱼十几尾，尝之。

廿四日(3月4日) 晴。来时晚，数刻即退。归小憩，入署。略看书。是日京察谕旨下，枢廷外直督、湖督、东抚三人议叙，餘照

旧供职。退时访芝庵于班所。

廿五日(3月5日) 晴和，是日午初上御紫光阁召见各国使臣。凡十国有书，四国无，使臣入殿凡七鞠躬，上以两次首肯答之。奕劻接国书，立而置诸案，跪奏毕起，降陛宣谕，每次如此。有国书者每国皆有致词，无者公同贺新禧致词。每次致词每次答谕，其公同致词则共一答谕。此次召见之先，巴兰德屡起驳难，不欲在紫光阁，并各带翻译，撤去面前黄案等，惟紫光阁一层未允，余皆允。

无书房，未入。晨出城，至夕照寺、卧佛寺、放生池，午归饭。晚邀孙、徐两公食黄花鱼，谈至戌正三刻。

廿六日(3月6日) 晴暖。照常入，闻昨日各夷使进见，天语清朗，该夷使窘慄成礼。来时晚，退时早。午后到署，画钱粮稿。访荫轩谈会典馆事。赴颂阁招，盛伯羲、王莲生、陆凤石、费妃怀、孙燮臣同坐，戌正二刻始散。是日内阁领衔谢照旧供职，余与孙兄在仪鸾门内碰头。小京堂引见，大理少卿廷禧步履维艰，休致。顺天府丞何桂芳上次京察请假，此次又复请假，休致。福建案内刘麒祥降五级调。是日宴各国使臣于总理衙门。

廿七日(3月7日) 晴，暖，液池冰尽释矣。入时稍早，已初一刻退矣，径归未出。看《会典》二本。写恽松云、瞿庚甫两信，交朱绩臣榕携去，绩臣来，曾送物，竟未答也。灯下翻阅《史记》并习字，未尝稍闲。

廿八日(3月8日) 晴暖，夜阴，二更风起。来时尚早，照常退。晨入克王来请，为南苑围墙伊欲再请，已具稿矣，余告以必核减，或分年，及此后桥梁等皆罢乃可。午后到署。送黄再桐行，病极，深可虑也。访赵伯远，谈伯述家事。归后点《史记》，看《姜湛园集》。微闻淀园有兴作，福海具舟十五，令福相主其事。得小山函，语挚。得鹿卿八日函，平安。得吴儒卿函。此两日吏部京察官过堂。

廿九日(3月9日) 晴,大风抵暮不已,顿寒。照常入退,畏风径归。无事,看《姜集》而已。写袁卿函,未发。

二月朔(3月10日) 晴,仍有风,早寒,晚风止。是日起四日无书房。寅初起,斌孙一等引见,余未往苑门。看书,小睡两次,体中似有病。午入署,洋款甚迫,三关告匱,部库正项待支者止六万,明日不敷发,只得以边防暂垫,与小云商略一切。改四川司折。职事冗要,未宜读书,深自儆省。上于办事后还宫,明后在宫,初四还海。

初二日(3月11日) 晴,无风,渐暖。直日,至景运门朝房,天明散。小憩,点《史记》一卷。赴国子监演礼,自午初至未初太常寺司官始来,余等上殿,四刻毕。退寻福箴亭问疾,已愈,长谈。访崇受之,亦略愈。

初三日(3月12日) 晴,无风而寒,晨见冰。是日上阅祝版后圣人堂行礼,天未明即叫引见。卯初二刻出乾清门,余等于寅正二即在朝房恭候,届时入至上书房,卯正站班,蓝袍补褂。毕即退。小憩,起写应酬字,不佳。午后入署,出城拜周懋琦,通州人,与徐文惠家姻亲,台湾府,曾出洋。未晤。过厂,略携字画归。周君送印度贝叶梵书经一片,洋金花瓶一个。

初四日(3月13日) 晴,早犹寒。是日上诣社稷坛行礼,坤宁宫吃肉,寅正二刻预备,早一刻出。余等于寅正二刻集朝房,卯初一刻即叫吃肉,少待即入,卯正退。余在第五层末。松淮署总宪,不与。归小憩,写对匾稍有意。发南信。京察一等引见毕,凡四日,斌孙蒙圈出。翰林三十五人圈廿二人,户部满司员九人,汉二人。沈澥秋国博来文翰。张樵野来,为广东监生录科事。那琴轩来,为各省未提款项事。乏甚。

初五日(3月14日) 晴暖。是日上还宫吃小肉,辰初到书房,已初一刻退。归卧仍乏,不知一衰至此。午后入署,出城拜客,过厂

肆。访钱子密谈中皿中额事，头晕。

初六日（3月15日） 阴，微雨飘洒。照常入退，归小憩，赴国子监，是日免堂期，予不知也。至则当月官他出，走卒导余入前堂，大怒诃之，坐待，一鹄面之书吏往复查考，始得初三日礼部来文，携归抄稿，并拟一复文，以七百名为广东录科额。当月官恩光、刘东美来，以稿付之，不免譴责。钱子密来，云高阳已允复中皿额，只须成均准定录科限制耳。此事予为中皿寒士起见，临期弃取，却甚为难。

初七日（3月16日）（洋灰鼠袍袷。）阴，晨起积雪寸馀，大风动地，寒甚，黎明雪止。是日成均值日，王云舫先散，萨、多、阔三君在彼，告以昨事，萨君以定额为不然，又未显言，唯唯否否。冒风入，照常退，下趺台阶数级，石滑倾跌，赖孙兄及一匠掖起，未大伤也。归后竟倦憩。作画一张，写信三函。刘康侯、朱亮生、吴移香。晚邀孙、徐两公饮，谈至戌正二刻。当月官来回恩光，文底回齐，各堂无异说，明日行。

初八日（3月17日） 晴，日出。昨卧不安，五更不能起，托孙公代直。晏起。作画，臂殊痛。午出城吊方长孺母丧。其父子听在。答朱提督春山淮森。过厂略坐，入署，颇苦事繁。归后麟芝庵、汪柳门来候，各赠三黄宝蜡丸，可感也。陈君炽送跌打方来。

初九日（3月18日） 晴，雪销，晨寒霜重。三黄丸得力，臂痛顿止矣，因再服之。照常入。退后拜客。归无事。晚复拜客，亦皆未晤。赵恩从南京来，甚喜，不见者五六年矣。买破书数种。是日吏部带老人班，均照旧供职。

初十日（3月19日） 阴欲雨，稍暖。是日江南督臣刘坤一到京请安，照常入退。访刘制军，未晤，以食品馈之。归小憩。入署。西洋法照相者沈阳人，客上海，呼以来试之，并令照画图。钞补《三国志》一页。弢为我购得白阳花鸟虫鱼册，价廉而精。御史高燮曾

递封事。闻请日讲，未发也。

十一日(3月20日) (始舟。)晴。晨在朝房与礼部诸公论广东录遗事，复寻高阳于荣仲华直庐。高阳云若中皿不满千则仍不得逾三十名之额，余曰若尔则我成均亦不欲多所摈弃，使录送过少矣，高阳意颇回。来时晚，有刘坤一起。退后即归。晚写字多。刘岷庄来长谈，此人精细，以台湾开山为不然，又言越南事，二十年后边疆必受大害，前此李扬才之获伊在两广煞费苦心也。昨高御史请日讲，奉旨引乾隆、嘉庆故事痛驳之。

十二日(3月21日) (春分。)晴，已刻大风扬尘，晚止有月。来时晚，刘君有起。退时风急，舟横岸。退后未能息，即入署，访子密论广东录科事。夜邀孙、徐两公，费杞怀饮，杞怀谈旧本书极博雅，菜四簋，潮州翁为龙所送。得钱晓岚禄曾函并墨、茶、术、桃等，其戚汤允孙沅宜带来。是日卯时伐木。

十三日(3月22日) 晴，晨寒，已刻大风，晚止。照常入，先退，归小憩。午后出城访晤高阳相国、若农侍郎，为中皿中额极费调停也。是日巳初二刻东院动工。

十四日(3月23日) 晴，寒，无风。照常入，来时早，退后午睡。小饮，睡稍多，得三刻。入署。

十五日(3月24日) (灰鼠一套，江獭冠。)晴，颇暖。晨寻箴庭谈，比入已还宫矣。来时极早，退照常。斌复第二次引见，丑正起，余未起，然不能睡矣。归后朱总戎淮森，号春山，行七，九江镇，寿州人，曾从文勤兄于患难中者也。来见，长谈。赴国子监定十九日带教习，王云舫未来，余人皆在。乏甚，不能用心。

十六日(3月25日) 晴，五更狂风起，冒风行。见张天瓶字四幅，甚佳。入时早，以抄本《涉史随笔》一册进，饭罢退。陈六舟来，因留点心。是日京察圈单下，斌孙记名以道府用，此次引见人员共

记八十三名，仅五名未记，从来所无也。晚赴仲华招，陪刘岷庄制军，礼、克两邸在坐，归亥初矣。

十七日(3月26日) 晴，无风，暖甚。内务府一等引见。照常入，退，归憩。入署，立谈时多，归写字。论古斋送瓶研来，赵公国麟物，吴门顾二娘所制，七十金不能少。谭文卿将至，遣何顺候之。发南信。夜发病。

十八日(3月27日) 晴，奇暖，未刻大风起。晨访福相官厅议事，入已晚矣，直日。来亦不早。退诣国子监朝房小憩，出东长安门访谭文卿同年于晋阳寺，文卿应召来京，右目已明，左目仍盲，五步外犹不了了，精神却好，今年七十矣。复访高阳相国，商礼部复御史广东录科事，中皿复卅六之额矣。过厂，无所睹。安徽直牧汤沅宜允称，行一。来见。钱晓岚之妻舅携晓岚信并茶、墨、茯苓、桃脯来，甚丰。又赠墨扇，受之，其人老练。季子固来。李伯行寄寒暑表二。

十九日(3月28日) 晴，午后有风。户部、国子监皆带引见，随吏部后，卯正二毕，来时不早矣。退归小息，右腿痠楚。入署。谭文卿来，长谈抵暮，亦颇谈人材消歇，民生困顿，相与嗟叹。额廉访裕如来辞行，此三十年前旧雨也，论时事尤切至，公廉正直，第一流也。得钱琴琛皖中函，求荐近地馆。

二十日(3月29日) 晴，晚阴，黄沙在天，风在上也。晨在公所，无可谈者。照常入退，归后未出。在成均朝房卧片刻，故精神有馀，抄《萍洲可谈》数页，此本与守山阁刻无一条同者，有昆山徐氏印，疑旧本也，然极无谓，吾坐此病深矣。得菴卿十一日所发函，何其速也。并得詠春函。得杨子鹤画册，三峰僧药龕所藏也。近有一僧携字画数件皆药龕物，可怪也。

廿一日(3月30日) 晴，风在高空，有黄气，晚晴朗。是日上诣醇贤亲王园寓三满月祭，无书房。晨抄《萍洲》十馀页，午后入

署。送额裕如，已行。晚招孙、徐两公来照相，因留饭，戌正散。发南信。

廿二日(3月31日) 晴，六起，引见多。无风。辰正二刻传撤书房，饭而出。访谭文卿谈，是日请安也，问新疆事极详。归后为文卿拟谢朝马折。赵展如舒翹，刑部旧属，今凤阳府，四十二岁。来见，语切实而劲，贤吏也。抄《萍洲可谈》，烦甚中辍。夜看《会典》三本。得伯述函。五嫂忌日，设奠。

廿三日(4月1日) 晴，有云气。照常入退。访芝庵于班所，归憩入署，看《会典》五本毕。留官喉痛发热，延董剑秋诊脉。荣仲华前日生日，送菜四点四补祝。新疆巡抚刘锦棠丁承重忧，以陶模为新抚。肝气大发，胁痛。

廿四日(4月2日) 晴，暖。是日皇太后临醇贤亲王府并幸颐和园，上于卯初诣宫请安，卯正三刻到书房，巳初一刻退，归小憩。出城拜客，晤陈六舟，送朱春生行，未晤，有赠，却之。晚入城，谭文卿在坐，长谈，饭而去。杨蓀芳从通州来，明日即行。陕藩放沈晋祥，湘臬放孙楫，仆少放许景澄。

廿五日(4月3日) 晴，晚阴，薄暮雨洒洒，俄顷止，带雪花，夜复一阵。有引见，来稍晚，照常退，午以清明节前二日设奠。入署，稿多甚乏。得吴匏庵研，斌所物色，大慰老腕矣。李岷琛放左江道，昨有召对，今日授赞善，又授斯缺，奇哉。昨夕未得眠。夜复雨。留官出疹，喉痛已愈。

廿六日(4月4日) 晴霁，晨雾，巳初大风起，退时不能坐船。午后写应酬字，稍可，秉烛写扇，送朱春山淮森也。黎莼斋观察出使日本归，来见，言日本兵政修，商务广，新立议院不和，大臣屡告休，与中国和洽，而深忌俄之垂涎东海也。伊有密奏，谓宜固中日之交，而冲绳可置勿议云。留官发疹愈。

廿七日(4月5日) (清明。)晴,仍有风,晚止,早寒晚暖。是日上诣奉先殿、寿皇殿行礼,见起极早。辰初还海,照常入退。小憩朝房,拜西城客,晤崇文山,长谈反复,为部事也。入署。门人沈蔼苍瑜庆,文肃之子,新捐道,南洋水师学堂总办。来谈。明日带引见后拟先退,出郭往西山一行。

廿八日(4月6日) 晴,晨风止。户部带引见,吏部及各处凡百余人。辰初退,未入直,适衙门有折稿须改,携回改之。已正登车出西直门,迂远数里,经八里庄之北,申正一刻抵四平台山麓,杏花盛开,徘徊其下,入山花转少矣。策骑至证果寺,寺僧纯公入城,晤其徒,饭罢步厓下,与赵松子谈诗,倦甚早眠。晚风起,不能上山。夜发病。

廿九日(4月7日) 晴,无风,午后风。日出起,摊书良久始得粥,粥罢腰舆登山,从者三,皆策蹇。先往东峰弘德寺,废寺也。杏花数百株,初开妍丽,策杖观之。僧瑞明。寺廊得石碣不及尺,题成化十八年御马监阿九修。门外石榜曰弘德寺,在草中。西越绝涧极仄,桥曰念佛,嘉靖中造。井曰龙王。崇祯己巳。登宝珠洞寻肉身像,南望莽然。入香界寺,僧鉴海索余笔迹,并恳告嵩公索香镫钱,玉兰一株正花,它处所无也,茶话片时。过龙王堂,有朱邸眷属在彼,亟避去。过大悲寺,有海棠沟。至三非庵,其西厢最宜眺远,两山横抱。僧理顺七十矣,朴实,香界退院也。午还证果寺,饭而行,时未初也。过一亭,两株红杏极妙。过徐庄饮茶,入破庙,与老兵语。入阜成门,到家酉初,俗事坌集。吴燮臣父病乞参,送一枝,明日复赠一枝。御史洪良品劾仓场侵欺怠弛,有旨派贵恒、许应骙会户部查办。廷雍放热河道。松淮之子英琨放银库员外,名次在后而先有所闻,奇事也。是日上诣醇贤亲王园寓行礼,百日祭也。

香资八两、茶厨三两、轿一十六千大钱、驴三九吊、酒钱轿驴五千、李姓八千、姚二车。二日廿吊,酒钱四吊。

三十日(4月8日) (羊皮冠,黑绒领。)晴,无风,濛濛然,热蒸。照常入退。小憩出城,赴高阳相公召,许筠庵、徐颂阁、李若农、张樵野、汪柳门同坐,食河豚,极鲜美。看郭天锡日记,蝨损数处,此墨迹较鲍刻多三倍。始见洪折。

三月朔(4月9日) 晴,无风,热甚,如四月中旬。照常入,退后小憩。入署,事繁,遇廖、徐、崇三君。归后筠庵来谈,定初五已初会商。芝庵来,抵暮去。发病。

初二日(4月10日) (棉袍褂。)晴,有风,仍蒙,顿热。照常入,退憩成均朝房。出城,诣松筠庵应徐颂阁、陆凤石、汪柳门三君之招,客为谭文卿,余与薛云阶陪,午集,申正散。归过厂,携沈凡民画册。是日皇太后幸颐和园,初四、六、八凡四日,闻四月廿八日欲驻园十日也。黎苑斋送汗简、日本花笺等,受之。赵舒翘送别敬,却之。

初三日(4月11日) 阴,早晴,晚风。国子监引见一名,随吏、刑二部后。辰正上至书房,照常退。归寓,谭文卿来谈。入署。归写字。

以黄骡一只老交长意之父拉去喂。

初四日(4月12日) 微阴,无风。起甚早,卯初即诣仪鸾殿请安。照常退,径归偃卧。山东、云南两司来。写应酬字。夜看官事。

初五日(4月13日) 微阴,顿寒,可皮衣,天气不正,可忧也。是日斌孙以京察一等预备召见。凡五起,斌第三起,卯正一刻入见。上至书斋有褒语,臣甚惶愧,辰正二先退。诣提督衙门公所,桂午桥、张相国在彼,同人陆续至,司官以所拟行仓场文请画。凡五项。坐次与桂、许两公略谈办法,大约归宿在以放代盘,亲勘工程而已。点心毕两公先散,与同官商筹库款事,午正多散。早寒,衣薄头疼,小饮困卧。景官发热出疹,请董剑秋处方,用表法。留官项肿。

初六日(4月14日) 寅初小雨,晨犹湿衣,已刻风起雨止,寒